

ԳԱՐԻԻՆԻ ՊԱՏԿԱՆՅԱՆ ԵՎ ՆԵՐՍԵՍ ԱՇՏԱՐԱԿԵՑԻ

Մ. Հ. ՄԵԼԻՔԱՆԻԱՆ

Գարիբին Պատկանյանն իր գրական-մանկավարժական և հասարակական գործունեությամբ խոր հետք է թողել մեր մշակույթի պատմության մեջ։ Որտեղ էլ որ աշխատել է նա, Աստրախանում, Նոր Նախիջևանում, թե Թիֆլիսում, մշտապես գտնվել է տեղերի հասարակական կյանքի կիզակետում, մեծապես նպաստել ազգի բարոյական առաջընթացին ու համաքաղաքացիների նյութական բարօրությանը։ Պատկանյանն Աստրախանում կոնսիստորիայի ատենադպիր էր և հայոց հոգևոր դպրոցի ուսուցիչ, Նոր Նախիջևանում գործունյա քահանա էր, հոգևոր կառավարության քարտուղար, ունեւր իր մասնավոր դպրոցը, որի շրջանավարտներից մի քանիսը հետագայում դարձան մշակութային և ազգային նշանավոր գործիչներ։ Թիֆլիսում Պատկանյանը դարձյալ զբաղվում է մանկավարժական աշխատանքով, նախ մասնավոր ուսումնարանում, ապա Ներսիսյան դպրոցում, որի սաները երկար տարիներ սիրով ու երախտագիտությամբ էին հիշում եվրոպական մշակույթի և գրականության նրա խանդավառ դասախոսությունները։ Թիֆլիսում Պատկանյան-գործիչն աչքի է ընկնում իր անբասիր տաղանդի նոր դրսևորումներով։ 1847-ին գործուն մասնակցություն է ցույց տալիս ժամանակի համար մեծ իրադարձության՝ «Կովկաս» թերթի խմբագրական աշխատանքներին (թերթի 3 խմբագիրներից մեկն էր), իսկ 1850—1851 թթ. հրատարակում է «Արարատ» ամսագիրը՝ արևելահայոց իրականության առաջին աշխարհաբար պարբերականը։

«Կովկաս» և «Արարատ» պարբերաթերթերում Պատկանյանը տպագրել է բազմաթիվ հոդվածներ՝ նվիրված կովկասահայ իրականության օրվա հուզող խնդիրներին, առաջին հերթին հայկական դպրոցներում ուսուցման գործի կասարելագործմանը։ Այդ թերթերում տպագրվել են Պատկանյանի բանասիրական, ազգագրական, բնագիտական հոդվածները, գեղարվեստական գործերը, քաղաքացիական ազնիվ դիրքորոշմամբ գրված բանավիճային ելույթները։

Չնայած իր լուսավորական անխոնջ գործունեությանը, նա ոչ միայն չի զնահատվել ըստ արժանվույն, այլև մշտապես գտնվել է հալածականի վիճակում։ Որքան էլ այդ տարօրինակ է, Պատկանյանը թեև իր ազգանվեր գործունեության ճանապարհին գրեթե միշտ շփվել է ներսես Աշտարակեցու հետ, չի ստացել նրա օժանդակությունը և չի խրախուսվել նրա կողմից։ Պատկանյանի կյանքն ու գործունեությունը բավականաչափ ուսումնասիրված է մեր բանասերների և պատմաբանների կողմից և մենք, իհարկե, չենք հավակնում նոր բան ավելացնել արդեն ստեղծվածին։ Սակայն, քանի որ Մաշտոցի անվան Մատենադարանի (այսուհետև Մատենադարան) արխիվում պահվող բազմաթիվ վավերագրեր լրացուցիչ լույս են սփռում Պատկանյանի և Աշտարակեցու խնձաված և բարդ փոխհարաբերությունների վրա, քննության առարկա ենք դարձնում այդ գործիչների «մենամարտի» մի քանի դրվագները, դրանք դիտարկելով առաջին աղբյուրից։

1827 թ. Պատկանյանի տեղափոխությունը Հաշտարխանից Նոր Նախիջևան, գրեթե զուգահեռաբար է ներսես Աշտարակեցու առաջնորդության շրջանին, և ամբողջ մեկ ու կես տասնամյակ նրանք թեև տարածությամբ միմյանցից հեռու (Ներսեսի նստավայրը Քիշնևում էր), բայց աշխատանքի բերումով գտնվում էին անմիջական շփման մեջ։ Երվանդ Շահազիզը «Տէր Գարիբին Պատկանյանի» աշխատության մեջ ամենայն մանրամասնությամբ ներ-

կայացնում է այն միջավայրը, որտեղ ապրում և գործում էր Պատկանյանը: Երիտասարդ տիրացուն և ուսուցչին, որը մի գլուխ բարձր էր կանգնած իր շրջապատից, ժամանակի մեծատունները և քաղաքի հայրերը նայում էին վերևից, փորձելով հանգցնել նրա հռանդի պոռթկումները հասարակական դորժերում: Քահանաները հանձին նրան տեսնելով ուժեղ մրցակցի, ամեն կերպ ջանում էին անվանարկել նրան: Ստեղծվում է մի վիճակ, որ երբ 1832 թ. Ներսես Աղտարակեցին Գրիգորիուպոլ քաղաքում նրան քահանա է ձեռնադրում, Պատկանյանը վճռում է հեռանալ Նախիջևանից: Սակայն ստացած նոր նշանակումները (և՛ մայր եկեղեցու քահանա, և՛ հոգևոր կառավարության քարտուղար), նրան հարկադրում են աշխատել Նախիջևանում: Կարճ ժամանակից, հենց նույն 1832 թ. վերջին, քաղաքային դուման՝ 186 ստորագրությամբ, մի դիմում է ուղարկում առաջնորդին, որով խնդրվում էր Պատկանյանին հեռացնել քաղաքից: Այնուհետև նրա կյանքն անցնում է մըշ-աական անախորժությունների մեջ: Ծահազիզը գրում է. առաջնորդից ստացած պաշտոնի բերումով սնա կամա, թե՛ ալկամա պիտի ամենասերտ հարաբերություն ունենար երեցփոխների, քահանաների, հոգևոր կառավարության անդամների և քաղաքի մյուս կառավարիչների հետ: Այս էլ դեռ բավական չէր, ամեն մի կնճռոտ գործ, ամեն մի փափուկ հանձնարարություն, ամեն մի անձնականություն շոշափող ու դրամական հաշվի վերաբերյալ խնդիր առաջնորդը սովորություն էր արել նորա միջոցով կատարել, նորա ձեռքով լուծել¹: Այս հանգամանքը նրան պահում էր շարունակական լարվածություն մեջ: Երբ առաջնորդն աղաներին անցանկալի որևէ կարգադրություն էր անում, նրանք գրգռվում էին, դրա պատճառ համարում Պատկանյանին և բողոքներ ու ամբաստանություններ ուղարկում առաջնորդին: Վերջինս իր հերթին «այդ բողոքներից եթե տասին չէր հավատում, տասից մեկին էլ է հավատում էր և հանդիմանություն գրում նորան, երբեմն և պատժում՝ փիլոնն առնում»²: Իրավիճակը սրում էր և Պատկանյանի ըմբոստրնավորությունը. նա չէր ենթարկվում հզորների կամքին, քրքրում, երևան էր հանում ճշմարտությունը, իսկ երբեմն էլ անձնականություն էր խառնում հասարակաց գործերին, եկեղեցու բնմիջ հաճախ պախարակում էր իր. թշնամիներին և ջատագովում բարեկամներին³:

Պատկանյանը հոգնել էր ամենօրյա այդ պայքարից: Իր գիտելիքների պաշարով, լեզուների իմացությամբ և մանկավարժական հմտությամբ նա կարող էր ուսուցչական աշխատանք կատարել լազարյան ճեմարանում և այդ համոզմունքով քանիցս դիմում է լազարյաններին՝ խնդրելով իրեն ուսուցչի և քահանայի պաշտոններ տալ ճեմարանում և Մոսկվայի եկեղեցում: Լազարյանների արխիվում պահպանվել է 1842 թ. հոկտեմբերի 12-ի թվակիր նրա նամակը՝ Խաչատուր և Հովհաննես Լազարյաններին, որում ասված է. «Բազում անգամ խնդրեալ եմ ընդունել զիս ՚ի հովանավորութիւն Ձերդ վեհազնութեանց վասն ծառայելոյ ՚ի սուրբ եկեղեցիս մայրաքաղաքիդ, և ՚ի հռչակաւոր ազգապարծանք ճեմարանի: Այժմ ծանեայ զի և վիճակաւոր արքեպիսկոպոսն սրբազանն Ներսէս Խանի ցուցանել առ այն զիւրն համահաճութիւն: Վասնորոյ այսու ամենախոնարհ խնդրով հայցեմ հաղորդել ինձ զբարեհաճութիւն Ձերդ վեհազնութեան և զվճիռ իմոյ ապագայ վիճակի...»⁴: Պատկանյանը սխալվում էր, կարծելով, թե Ներսես Աղտարակեցին համամիտ է իր ցանկությունը: Դեռևս 1840 թ., ի պատասխան Խ. Լազարյանի հարցման, թե նա ինչ կարծիք ունի Պատկանյանի մասին, որին ցանկանում էր հրավիրել Մոսկվա, Ներսեսը հունիսի 1-ի թվակիր նամակում ասում է. «...թեպետ ճանաչի նա յայլոց գիտուն ոմն, այլ որպէս ինձ է յայտնեցեալ գոր-

1 Ծ. Ծահազիզ, Տէր Գաբրիել Պատկանեանց, Թիֆլիս, 1910, էջ 52:

2 Նույն տեղում, էջ 53:

3 Նույն տեղում, էջ 76:

4 Մատենադարան, Լազարյանների ֆոնդ, Թղթ. 107, գործ 44, վավ. 104:

ծովք ո՛չ սխալիմ ասել, թե նա՝ է՛ անծանօթ իւրումն գիտութեան և գիտութիւն նորա՝ ամենեւին անծանօթ անձին նորա։ Աղաչել պարտ է զաստուած, զի նա նոր գիտութիւն նմա շնորհեսցէ ողորմութեամբ իւրով, ապա թէ ոչ՝ գիտութիւն նորա կորուստ է անձին նորա և կորուստական ընդ այն աշակերտելոց նմին»⁵, Այնուհետև շուգենալով դուրս գալ պատշաճութեան սահմաններէց, նա հարցի վերջնական վճիռը թողնում է լաղարյանին, իր կողմից ավելացնելով միայն, որ այն ուսուցիչները, որոնցից նա դժգոհել է անցյալում, Պատկանյանի (ապիկարութեան) համեմատութեամբ չեն կարող նույնիսկ նրա ճկույթը լինել։

1841 թ. ապրիլի 15-ի թվականի նամակում Խ. Լաղարյանի ուղարկած՝ Գ. Պատկանյանի նամակին ծանոթանալուց հետո ներսես Աշտարակեցին գրում է. «Զդիր սրաւեզու Տէր Գաբրիէլ քահանային Պատկանեան ընթերցեալ՝ վերագարծուցանեմ ահա, որոյ զնմանօրինակն և առ իս ունի գրեալ գահանայն, անկշռադատ և անհամաձայն՝ ի բանս իւր և ի կամս»⁶։

1842-ի նոյեմբերին Խ. Լաղարյանը կրկին դիմելով առաջնորդին, խնդրում է թույլատրել Գ. Պատկանյանին մեկնել Մոսկվա և ստանձնել հայոց լեզվի ուսուցչի պաշտոնը, որով կբարելավվէր այդ առարկայի ուսուցման գործը ճեմարանում⁷։ Հավանաբար, ի պատասխան այդ նամակի, 1843 թ. մարտի 3-ի թվականի նամակում ներսեսը հայտնում է. «Յաղագս Տէր Գաբրիէլ քահանայի Պատկանեան կանխաւ յառաջ յայտնեալ եմ, թէ դժուարատանելի է բնութիւնս նորա, և լեզու նորա անսանձ...»⁸։ Դարձյալ անդրադառնալով նրա «անհնազանդութեանն» ու «անկարգութեանը», նամակագիրը հայտնում է, որ Պատկանյանի՝ Մոսկվա մեկնելու խնդրանքի կապակցութեամբ ինքն արգեն նրան ուղարկել է ընդ երկար յոյժ՝ մի նամակ։ Այդ «յոյժ երկար», 15 լայնածավալ էջերից կազմված նամակի պատճենը ներսեսն ուղարկում է Խ. Լաղարյանին, ցրելու համար նրա պատրանքները Պատկանյան-մարդու և ուսուցչի վերաբերյալ («...ըստ որում խոստացաք քանիցս, վասն արժանաւորապէս ճանաչելոյ զգրութիւն հոգւոյ Գաբրիէլ քահանայի Սերոբեան»)։ Նամակի այդ պատճենի տակ նա իր ձեռքով ավելացրել է. «Յաղագս ուսուցչի Ձերում ուսումնարանի, խնդրեմ առ փոքր մի ևս երկայնամտեալ հանգիստ պահպանել զսիրտդ։ Եւ ես յուսամ, թէ շնորհն Աստուածայ յաջողեսցէ մեզ գտանել զոք ըստ սրտի Ձերում»⁹։ Պատկանյանի հարցն անդառնալիորեն փակված էր, և Լաղարյանն ամփոփում է խնդիրը։ Նա գրում է ներսեսին, որ գոհ է նրանից՝ Պատկանյանի մասին սպառել տեղեկութիւններ ստանալու համար. «...Եթե այնպէս դժնդակ է նա բարութ, չէ հարկաւոր մեզ՝ բերել զնա ի Մոսկով քաղաք»¹⁰։

Պատկանյանին ուղղած ներսեսի վերոհիշյալ նամակի առիթը էջմիածնի վանքի գլխավոր կառավարիչ Բարսեղ արքեպիսկոպոսի նամակն էր, որով նա խնդրում էր ներսես Աշտարակեցուն՝ բարեւավել Պատկանյանի վիճակը¹¹։ Ներսեսը միաժամանակ ստանում է և Պատկանյանի 1842 թ. սեպտեմ-

⁵ Նույն տեղում, վավ. 10։

⁶ Նույն տեղում, վավ. 31։

⁷ Տե՛ս Մ. Սաղյան, Պատկանյաններ, Երևան, 1982, էջ 85։

⁸ Մատենադարան, Լաղարյանների ֆոնդ, թղթ. 107, գործ. 44, վավ. 121։

⁹ Նույն տեղում, վավ. 131։

¹⁰ Ալ. Երիցյան, Պատմութեան 75-ամյա գոյութեան ներսեսյան հայոց հոգևոր ղեկավարների (1824—1899), հ. Ա, Թիֆլիս, 1898, էջ 474։

¹¹ Ալ. Երիցյանը գրում է, որ պահպանվել են Պատկանյանի նամակները՝ ուղղված Սինդի անդամներին, որոնցում նա, գանգատվելով առաջնորդի անբարյացակամութեանից, խնդրում է իրեն ազատել նրա ձեռքից և տեղափոխել Թիֆլիս (նույն տեղում, էջ 475)։ Այդ մասին Մ. Սաղյանը գրում է. «Մատենադարանի կաթողիկոսական դիվանի ֆոնդերում պահպանված Գաբրիէլ Պատկանյանի բազմաթիվ դիմումները, սկսած 1830 թվականից մինչև 1853 թվականը, լի են Մոսկվա, Թիֆլիս, Աստրախան տեղափոխելու խնդրանքներով» (Մ. Սաղյան, նշվ. աշխ., էջ 85)։

բերի 15-ի թվակիր նամակը, հավանաբար, Մոսկվա մեկնելու թույլտվության խնդրանքով: Մեկընդմիջտ դադարեցնելու նպատակով իրենց մեջ տարվող ժամարժան գրադրությունները, Ներսիսը կազմում է իր տեսակի մեջ եզակի մի փաստաթուղթ՝ վերջին տարիներին Պատկանյանից ստացած և նրան ուղարկած նամակների կարևոր քաղվածքների վերաշարադրանքը: Այդ նամակները պարունակում են առաջնորդին ոչ վայել հայհոյական արտահայտություններ, խիստ հանդիմանություններ, խրատներ ու քարոզներ: Դրանցում նա ներկայացնում է Պատկանյան-քահանայից իր անբավականության պատճառները և փորձում հիմնավորել Մոսկվայում աշխատանքի անցնելու նրա խնդրանքի մերժումը:

Նվ այսպես, նրանց գրադրությունից հայտնի են դառնում Պատկանյանի բողոքներն ու դանդաղանքները, որոնց Աշտարակեցին մեկ առ մեկ պատասխանում է, սառը հաշվենկատությամբ հերքում նրա փաստարկները, ընդ որում ավելի հայհոյում, քան փորձում դրանց պատասխանել ըստ էության: Մանրամասն քաղ բողոքների բնույթին:

Մի նամակում Պատկանյանը Ներսիսին հիշեցնում է, որ նրա կողմից պատժվելու և փիլոնից զրկվելու կապակցությամբ շատ դառնությունների է հանդիպել: Այս առիթով Ներսիսը վերաշարադրում է նրա խոսքերը. «Գրես, թէ երկիցս զբկեցայ ՚ի փիլոնէ, յանջնջելի արատիս անուան իմոյ, և ժառանգեցի զբարկութիւն իմոյ արքեպիսկոպոսիդ յայն աստիճան, զի ահա քանի ամբ են յորս կողկողիմ ի խնդրել զգթութիւն և ոչ լսելի լինի ձայն իմ...»: Պատկանյանը այնուհետև գանգատվում էր այն բանից, թե հաջողությամբ ու առաջադիմության դռները փակ են իր համար և ինքը դատապարտված է հավերժական անվանարկման ու անբախտության: «Յայսմիկ նախիջեման քաղքի,—ասեք մարգարեանալով գրում է նա,—հատեալ են գին զըլխապարտութեան իմոյ և դատակնիք անվերջանալի հալածանաց»¹²:

Հերքելով նրա փաստարկները, Ներսիսն իր նախորդ նամակներից բերված մեջբերումներով հիշեցնում է Պատկանյանին, որ շնայած ինքը միշտ նրան խորհուրդ է տվել անբասիր կատարել պարտականությունները, բայց նա թե՛ իբրև քահանա, թե՛ իբրև հոգևոր կառավարության քարտուղար և թե՛ իբրև ուսուցիչ, ձախողել է այդ գործերը: Պատկանյանն ինչպես պատասխան նամակներում, այնպես էլ հետագայում գրած «Նոր-Նախիջևանի պատմությունը» գրքում հետևյալ պարզաբանումներն է տալիս, որոնք ներկայացնում են իրերի իսկական պատկերը, գծությունների պատճառները տեղում:

Երբ 1832 թ. Պատկանյանը ձեռնադրվելով քահանա, Քիշնեից վերադառնում է Նախիջևան, պարզվում է, որ քաղաքագլուխ Մարկոս Պոպովը քաղաքային դպրոցի գործերը քայքայման է հասցրել: Նա ուսուցիչների համար նախատեսված աշխատավարձի գումարը 1000 ռուբլուց իջեցրել է 400-ի, իսկ իր հայր Սերոբի և եղբայր Պետրոսի 400 ռ. աշխատավարձը կտրել էր այն պատճառաբանությամբ, թե Գարրիիը պետք է աշխատանքի անցնի հոգևոր կառավարության մեջ: Սերոբ և Պետրոս Պատկանյանները, բնականաբար, թողնում են դպրոցը: Գ. Պատկանյանը Ներսիսի կարգադրությամբ, հոգևորականների զավակների համար բացում է սեմինարիա (սերմնարան կոչված դպրոցը), որը գործում է 1832—1835 թթ. և փակվում դարձյալ սադրանքների հետևանքով: Դրան զուգընթաց, նա իր պարտականությունները մշտապես կատարում էր նաև հոգևոր կառավարության մեջ, վարում բոլոր գրադրությունները: Քաղաքագլխի և Պատկանյանների փոխհարաբերությունները գնալով վատանում են. 1832-ին Պոպովը կազմակերպում և առաջնորդին է ուղարկում մի նոր համախոսական, որով Նախիջևանի քաղաքացիները պահանջում էին քաղաքից հեռացնել աբդեն Պատկանյանների ամբողջ գերդաստանը: Պատկանյանը, հավանաբար, կատարել է հակաքայլեր,

¹² Մատենադարան, Լազարյանների ֆոնդ, թղթ. 107, գործ 44, վավ. 137, էջ 21:

որոնք ավելի են խորացրել ստեղծված հակասությունները: Պատկանյանին խանգարում էին նրա շիտակությունը, համարձակությունը, նաև, ինչպես նորիցյանն է գրում, նրա «անհանգիստ բնությունը և քանի մի խոշոր պակասությունք», որոնք չէին ներվում: Այս ամենի հետևանքով Պատկանյանը 1836-ին առաջնորդի կողմից զրկվում է քահանայադործությունից, Ռոստովում քննություն տալով ձեռք բերում ուսուցչության իրավունք և բացում հեռադպրում մեծ համրավ ստացած իր երկրեզվյան մասնավոր դպրոցը:

Խորագրությունը քաղաքի հասարակական կյանքում բարդանում էր, սեռը նախիջևանի պատմությունը գրքում Գ. Պատկանյանը խոսում է 1842—1853 թթ. նախիջևանի անփոփոխ քաղաքագլուխ Հ. Խալիբյանի զանցանքների: չարաշահումների, անբարոյական արարքների մասին: Այդ ամենը հիմք ունենալով է, որ երբ Խալիբյանը 1842 թ. ընտրվում է քաղաքագլուխ, Պատկանյանը մի նամակով խորհուրդ է տալիս առաջնորդին, որպեսզի նա կամ անձամբ խոսի Նովոռոսիյսկի և Բեսարաբիայի նահանգապետ իշխան Մ. Վորոնցովի հետ, կամ որևէ մեկին ուղարկի նրա մոտ՝ արգելելու քաղաքագլխի հաստատումը: Այս նամակը սաստիկ զայրացնում է Ներսեսին, և նա Պատկանյանին մի ջախջախիչ պատասխան է հղում, որից քաղվածքներ են բերված հիշյալ «յոյժ երկար» նամակում:

Կարճ ժամանակից Պատկանյանը Ներսեսին նորից է զայրացնում, մի նամակով հայտնելով, թե անհնար է համարում որևէ լուրջ գործ կատարել հոգևոր կառավարության անդամների հետ, և թե ինքը գերադասում է ինքնուրույն լուծել հարցերը, Ներսեսի պատասխան նամակից պարզվում է, որ այն բանից հետո, երբ Պատկանյանը առաջնորդին խորհուրդ էր տվել տալիս քաղաքագլխի հաստատումը (մի բան, որ Ներսեսը ամոթալի առաջարկ է համարում իր կողման համար), առաջնորդն արգելել էր նրան ինքնուրույն որևէ քայլ կատարել, առանց պաշտոնական գործակիցների համաձայնության: Այս պահանջը նա կրկնում է և այս նամակում:

Բնավ չխնայելով Պատկանյանի արժանապատվությունը, նրա այն խրճուղանքին, թե քանի որ որդիները սովորում են չազարյան ճեմարանում, նպատակահարմար է, որ ինքը ևս մեկնի մայրաքաղաք, Ներսեսը պատասխանում է, թե այդպիսի հորից հեռու գտնվելը բարեբախտություն է որդիների համար: Ինչ վերաբերում է Մոսկվայում քահանայադործությամբ և ուսուցչությամբ զբաղվելու թույլտվություն տալուն, ապա միանգամայն որոշակի հայտարարում է, թե Քալական քահանայք կան արդեն ի Մոսկովա: Ուսուցչության համար նույնպես չի երաշխավորում նրան, որովհետև Աշտարակեցու համոզմամբ նա չէր կարող աշխատել ճեմարանում, քանի որ իբրև մանկավարժ չէր արդարացրել իրեն: Դաժանության հասնող անարդարություն կար նրա մի դիտարկության մեջ, որով ոչնչի էր հավասարեցվում Պատկանյան-մանկավարժի վաստակը: «Դու ցույց մեզ,— գրում է նա,— թե ցարդ վայր քում հասակի՝ ո՛ւր ուրեք, ո՛վ ոք գտանի քո աշակերտ՝ բուհալ ի քէն, զիմն ինչ»: Դարձյալ խորհուրդ է տալիս արժանավոր գործերով աչքի ընկնել և ոչ թե «սովորական քեզ՝ սեթեթությամբ բառից մրելով ըստ անցելոցն զսպիտակութիւն թղթոց»¹³:

Ինչո՞վ կարելի է բացատրել առաջնորդի նամակների բիրտ ոճը, նրա անթաքույց ատելությունը Պատկանյանի նկատմամբ և վերջինիս՝ գրեթե ֆիզիկապես ճգմել-ջնջելու նրա ցանկությունը: Այս հարցի պատասխանը, կարծում ենք, միանգամայն ստույգ ձևակերպում է ստացել վերոհիշյալ վավերագրի՝ կից գրության մեջ: Խ. Լալարյանին ուղարկելով իր կազմած նամակ-մեղադրանքը, Ներսես Աշտարակեցին խոստովանում է, որ Պատկանյանին ուղղած իր նամակների միջոցով ձգտել է դաստիարակել «գնդի նորա և զկամս և զլեզու և զգրիչ, ըստ արժանի իւրումն քահանայական կոյման»:

¹³ Նույն տեղում, էջ 1/

բայց ապարդյուն, գրում է նա, որովհետև դրանք անօգուտ են անցել և իզուր աշխատանք՝ իր համար¹⁴ (ընդգծ. մերն է—Մ. Մ.):

Պատկանյան-գործիչը և մանկավարժը իր տաղանդի, սեփական համոզմունքների և ինքնավստահության բերումով գործում էր ինքնուրույն, և իր անկախ պահվածքով ու ըմբոստ նկարագրով զայրացնում Ներսեսին: Վերջինիս չի հաջողվում ընկճել («դաստիարակել») հանդուգն գործչի հոգին, կամքը, լեզուն կամ գրիչը, ուստի և դիմում է իր ունեցած հզոր զենքի՝ բռնություն օգնությանը: Աշոտ Հովհաննիսյանը հետևյալ ուշագրավ ընդհանրացումն է անում. «Կասկածամիտ ու խանդոտ Ներսեսը չէր սիրում մանավանդ մտավոր գերազացություն կամ կարող էին միաժամանակ պաշտպանել նրա դեմ իրենց արժանապատվությունը: Հանդիպելով ընդդիմության, նա ջանք չէր խնայում քմայքի ու իշխանության աղորիքով փոշիացնել ըմբոստներին: Հոգևոր տիրոջից «սրդողած»՝ փախուստով զլուխ պրծեցրին Կարապետ Շահնազարյանն ու Աբել Մխիթարյանը: Նրանից տուժեցին Ալամզարյանն ու Սալլանթյանը, Թադևոսյանն ու Արսլանը, Շանշյանն ու Գարրիբի Պատկանյանը: Հալածանքի ենթարկվեց նաև վերջինիս հանդուգն աշակերտը՝ Նալբանդյանը»¹⁵:

Պատկանյանի վիճակի ողջ ողբերգականությունն այն էր, որ դեմ առ դեմ կանգնած էին երկու գրեթե հավասար ուժեր. Պատկանյանն առաջնորդին չէր զիջում իր տաղանդով, հոգու կորովով ու նպատակին հասնելու հետևողականությամբ, մի բան, որ հաստատվում է և Ներսեսի հետևյալ բնութագրումով. «Ինչ անհամաձայն և անհաւան ամենեցուն, և այլք առհասարակ անհամաձայն և անհաւան քեզ: Եւ ի վերա այսր ամենայնի դու ջատագով քում շարաշուք ունակութեանց, և ես ամբաստան և բողոքաւոր զայնմանէ: Դու անհաւան իմում երկայնամտութեանց, և ես անհաւան քում ինքնահաւանութեանց և մշտավտանգ շարաբանութեանց, և տղայամիտ առանձնախօսութեանց»¹⁶: Ուժերի հենց այս օրելիտիվ հաշվեկշռի գիտակցումն էլ Ներսեսին դարձնում էր անզիջող ու անարդար:

1842 թ. վախճանվում է կաթողիկոս Հովհաննես Կարբեցին: 1843-ին ընտրվում և ապա նույն թվականի օգոստոսին Նիկոլայ Առաքինի կողմից կաթողիկոս է հաստատվում Ներսես Աշտարակեցին: 1843-ին նա մեկնում է Պետերբուրգ, ինչպես Ծ. Շահազիզն է դրում՝ չանօրինակ շքով ընդունվում կայսրից» և մի քանի ամիս մայրաքաղաքներում անցկացնելուց և բուժվելուց հետո վերադառնում Քիշնև: 1844—1845 թթ. նա շարունակում է ապրել Քիշնևում, ապա Ղրիմում և վերջապես Նոյեմբերի սկզբին Կովկաս մեկնելուց առաջ մտնում է Նոր Նախիջևան, Դեռ քաղաք չհասած, նրան Տազանրոգին մոտ գտնվող փոստային կայանում դիմավորում են հալիբյանը, Խըռմաճյանը և այլք («գլխավորապես Պատկանյանի հակառակորդները»), որոնք մեծ պատիվներ են տալիս նորընտիր կաթողիկոսին և մեկ օր անց նրան ուղեկցում քաղաք: Ահա այդ հանդիպման ժամանակ էլ, գրում է Ծ. Շահազիզը, «եթե հալիբյանը բոլոր ժամանակ նստած է լինում կաթողիկոսի կողքում, վճռվում է ամեն բան — և՛ տէր Գարրիբի տեղափոխվելը Թիֆլիս, ...և՛ առաջնորդական գործակատարության պաշտոնի և եկեղեցական գումարների հալիբյանի հանձնվելը և այլն և այլն»¹⁷:

Ներսես Աշտարակեցին դեռևս երկու տարի առաջ, 1843-ի վերջերին, Մոսկվայից «պատվեր է ուղարկում իրան, Պատկանյանցին, թե թող նա

¹⁴ Նույն տեղում, վավ. 131:

¹⁵ Ա. Շ. Հովհաննիսյան, Նալբանդյանը և նրա ժամանակը, գիրք 1, Երևան 1955, էջ 48:

¹⁶ Մատենադարան, Հազարյանների ֆոնդ, թղթ. 107, գործ 44, վավ. 137, էջ 8:

¹⁷ Ծ. Շահազիզ, նշվ. աշխ., էջ 81:

պատրաստ լինի յուր արածների արժանի վարձն ստանալու»¹⁸, Իսկապես, Նախիջևան հասնելու հաջորդ օրն իսկ՝ «կաթողիկոսի հրամանով ատյան է կազմվում և Պատկանյանցն առավոտյան ժամը 10-ին կոչվում է դատի, որ պիտի լինեն քաղաքի բոլոր մեծամեծների ներկայությամբ և հատուցանեն նորա արածների արժանի վարձատրությունը»¹⁹։ Զարժե մեկ առ մեկ հիշել Պատկանյանին ներկայացված մեղադրանքները, որոնք հիմնականում կապվում էին նրա անհնազանդ լինելու, «սանձակոտոր ու ամեհի» բնավորության և, մասնավորապես, էջմիածին ուղարկած մի նամակի հետ, որում նա գանգատվել էր Ներսեսի անբարյացակամությունից։ «Այս դատին արգասիքն այս եղավ,—հետագայում գրել է Պատկանյանը,—որ Տէր Գաբրիէլն թիֆլիս հեռացնելու որոշումն եղավ»²⁰, Այս օրերին, թերևս Պատկանյանին հանգստացնելու դիտավորությամբ, նորընտիր կաթողիկոսը նրան ասում է. «Դու ինձ պետք ես կովկասում. Ներսիսյան դպրոցը քեզ պիտի հանձնեն»²¹, 1846 թ. հունվարի 20-ին Պատկանյանն ընտանյոք թողնում է նոր Նախիջևանը։

Պատկանյանի թիֆլիս տեղափոխվելու վերաբերյալ հայտնվել են միանշանակ և, անշուշտ, ճշմարիտ այն կարծիքները, որ Ներսեսը, կանխամտածված, քաղաքի մեծամեծներին ազատելու համար Պատկանյանի «անհարմար» հարևանությունից, նրան «հեռացնում է Նախիջևանից» (կամ՝ «փոխադրում թիֆլիս», և կամ՝ «քշում թիֆլիս»)։ Ժիշտ է, հայ բանասերներն ու պատմաբանները այդ տեղափոխությունն անուղղակիորեն ընդունում են իբրև աքսոր, բայց միայն Շահազիզի գրքում է այդ իրողությունն ստացել իր պաշտոնական, իրավական որակումը։ 1853 թ. սեպտեմբերի 23-ին Հարություն հալիբյանը քննիչին ներկայացրած ցուցմունքում գրել էր, որ Պատկանյանին ինքը երբեք չի հալածել կամ սպառնացել, այլ «կարելի է ասել,—գրում է նա,—որ ես եղել եմ նորան բարյացակամ և բարերար, որովհետև նա երբ 1845 թվին հայոց կաթողիկոսի հրամանով աքսորվեց Նախիջևանից թիֆլիս, ես էի, որ հասարակության խնդիրքով միջնորդեցի վեհափառ կաթողիկոսի առաջ՝ նորան նորից Նախիջևան վերադարձնելու»²², Այս ամենից հետո միանգամայն տրամաբանական է դառնում և այլևս տարակուսանքներ չի հարուցում Պատկանյանի՝ «աքսորականի» վիճակը թիֆլիսում։ Այստեղ նա առաջին տարիներին մնում է առանց աշխատանքի։ Ներսես Առաքարակեցին չի հատարում նրան տված խոստումը. ավելին, երբ մանկավարժական աշխատանք կատարելու հնարավորություն է բացվում ռուսական դպրոցներում, և տեղի դպրոցական գործերի հոգաբարձու Սեմյոնովը խնդրում է՝ Պատկանյանին թույլատրել աշխատելու որպես կրոնուսույց, կաթողիկոսը նրա փոխարենն ուղարկում է երկու այլ ուսուցիչների։ Ընտանիքի կարիքները հոգալու համար Պատկանյանն իր եղբոր՝ Միքայել Պատկանյանի հետ մասնավոր դպրոց է հիմնադրում։ Նա միաժամանակ աշխատակցում է «Կովկաս» թերթին՝ 1847-ից դառնալով խմբագրական մարմնի անդամ։ Այս օրերի մասին Ալեքսանդր Երիցյանը գրում է. «Այստեղ ևս Տէր Գաբրիէլը շարժանացավ Հայրապետի շնորհաց։ Մանավանդ թե Վեհի անբավականությունն ավելի ևս մեծացավ, երբ Տեր Գաբրիէլը աշխատակցելով նորաբողոքոչ «Կովկաս» հայոց լրագրին, 1847 թվին բանակով մտավ ռուսաց Բողոմոլով քահանայի հետ և անպատվեց սորան հիշյալ թերթում։ Հետևանքը, որպես հայտնի է, այն եղավ, որ իշխան Վորոնցովի դատավճռով Տեր-Գաբրիէլը 100 ռուբլի տուգանքի ենթարկվեց, իսկ «Կովկաս» հայ լրագիրն ստիպվեցավ դադարիլ»։ Այնուհետև կաթողիկոսը կարգադրում է թույլ չտալ Պատկան-

¹⁸ Նույն տեղում, էջ 78։

¹⁹ Նույն տեղում, էջ 81։

²⁰ Գ ա բ Ր ի ի լ Պ ա տ կ ա ն յ ա ն, Նոր-Նախիջևանի պատմությունը, Նոր-Նախիջևան, 1917, էջ 112։

²¹ Ե. Շ ա հ ա զ ի զ, Նշվ. աշխ., էջ 84։

²² Նույն տեղում, էջ 98։

յանին մտնել Ներսիսյան դպրոց: Խոլերայի պատճառով դպրոցը մեկ տարով փակված էր: Այն բացվում է 1848-ի ամռանը, և նոր վերատեսուչ հաստատված Կարապետ Շահնազարյանը Պատկանյանին հրավիրում է հայոց լեզու դասավանդել բարձր դասարաններում: Լսելով այդ մասին, Ներսես Աշտարակեցին վրդովվում է: Դպրոցի նորընտիր խորհրդարանը նրան ուղղած նամակում հայտնում է, որ այդ վճիռը կայացվել է հարկից ստիպված, որովհետև ներկայումս չկա Թիֆլիսում ոչ ոք հիմնավորապես դիտացող այդ լեզուն և որ կատարելապես համապատասխաներ աշակերտաց այն հառաջդիմության, որ կսպասե խորհրդարանս»²³:

1849 թ. վերջին միայն Պատկանյանը նշանակվում է Նորաշեն եկեղեցու ավագ քահանա: 1849-ի ամռանը Շահնազարյանն իր դիմումի համաձայն ազատվում է Ներսիսյան դպրոցի վերատեսուչի պաշտոնից: Նրա փոխարեն մի քանի ամիս աշխատում է Պետերբուրգից հրավիրված Պետրոս Շանշյանը: Վերջինիս հրաժարականից հետո միայն, դպրոցի հոգաբարձուներ Ի. Արղությանի, Գ. Մանգինյանի և Դ. Խերողինյանի խնդրանքով, 1850 թվի հունվարից Ներսեսը Պատկանյանին նշանակում է դպրոցի տեսչի պաշտոնակատար: Նույն թվականի սեպտեմբերից Պատկանյանը սկսում է հրատարակել «Արարատ» շաբաթաթերթը, բայց հենց այդ ժամանակ էլ հարկադրված է լինում փակել իր մասնավոր դպրոցը, քանի որ, ինչպես գրում է Ե. Շահազիզը, «Կաթողիկոսը գանգատվում էր, որ նորա մասնավոր դպրոցն արգելք է լինում նորան բուլղոմիին նվիրվել «Ազգային հոգևոր դպրոցին»: Նա մինչև իսկ անբավական էր, որ նա խմբագրում էր «Արարատը» և սորան-նորան ասում էր, թե նա ավելի զբաղված է «Արարատի» սրբագրությամբ, քան թե դպրոցի գործերով»²⁴:

Մինչ այս փոփոխությունները տեղի կունենային, 1849 թ., երբ Պատկանյանի վիճակը դեռևս չէր կարգավորվել, նա դիմում է Նախիջևանի իր բարեկամներին՝ իրեն Նախիջևան կանչելու խնդրանքով: Պատկանյանի յուրայինները քաղաքագլուխ Խալիբյանի ստորագրությամբ համապատասխան դիմում են կազմում և ուղարկում կաթողիկոսին: «Սակայն մեկ տարի անց,— գրում է Մ. Սաղյանը,— երբ արդեն սկսվել էր քահանայի երկար տարինների բաղձանք «Արարատի» հրատարակությունը, երբ նա վերջապես ստանձնել էր Ներսիսյան դպրոցի տեսչությունը, իհարկե, այլևս չէր կամենում տեղափոխվել Նախիջևան: Եվ հենց այդ ժամանակ, պատրվակ բռնելով մի անախորժ դեպք տեսչի կրտսեր եղբոր՝ ռուսաց լեզվի ուսուցիչ Միքայել Պատկանյանի և ստորին դասարանի դասատու և վերակացու Ռաֆայել Պատկանյանի միջև, կաթողիկոսը մտաբերում է մեկ ու կես տարի առաջ ստացած խընդրագիրը և փութով ճամփում Գաբրիելին Նոր Նախիջևան՝ ընդառաջ նորանոր փոթորիկներին»²⁵: Նա կարծես ուրախանում է, «որ կարող է այդպիսով ազատվել նորանից», գրում է Ե. Շահազիզը²⁶: 1851 թ. ապրիլին Պատկանյանը լույս է ընծայում «Արարատի» 33-րդ համարը և մեկնում Թիֆլիսից: Գաբրիել Պատկանյանը հայրենի քաղաքն է հասնում 1851-ի հունիսին, եկեղեցական գումարների շուրջ բորբոքված կոնվենտի ամենաթեժ պահին և իրեն հատուկ եռանդով նետվում է պայքարի մեջ:

Հայրապետյան կուսակցության ուժեղացումը դրդում է Խալիբյանին լուրջ միջոցներ ձեռնարկել և նա, 1853 թ. ամռանը, իր կյանքի դեմ մահափորձ կազմակերպելու կեղծ մեղադրանքով, ձերբակալել է տալիս Պատկանյանին: Ամբողջ յոթ տարի Պատկանյանն անց է կացնում Ռոստոմի բանտում, այնուհետև մի կարճ միջոց հսկողության տակ ապրում է Նախիջևանում, բայց Խալիբյան—Գ. Այվազովսկի խմբակցությանը հաջողվում է նրան

23 Ա. Երիցյան, նշվ. աշխ., էջ 475—476:

24 Ե. Շահազիզ, նշվ. աշխ., էջ 85:

25 Մ. Սաղյան, նշվ. աշխ., էջ 90:

26 Ե. Շահազիզ, նշվ. աշխ., էջ 86:

վտարել տալ քաղաքից: 1863 թ. աղատվելով աքսորից, Պատկանյանը բնակություն է հաստատում որդիների մոտ, Պետերբուրգում, ուր անց է կացնում կյանքի վերջին 26 տարիները: 1853 թ. ավարտվում է Գ. Պատկանյանի հասարակական-լուսավորական արգասավոր գործունեությունը: Հետագայում Ռոստովի բանտում և աքսորում նա մշտապես զբաղվում է գրական աշխատանքով և ստեղծում գեղարվեստական բազմաթիվ գործեր (հիմնականում աշխարհաբար) և պատմական-հրապարակախոսական աշխատություններ ու հոդվածներ²⁷: Պետերբուրգում նույնպես նա զբաղվում է գրական աշխատանքով, օգնում Ռ. Պատկանյանի հիմնադրած «Հյուսիս» շաբաթաթերթի հրատարակության գործին:

Պատկանյանի աքսորի վերջին շրջանում Մատթեոս կաթողիկոսը դիմելով Կովկասի փոխարքային, խնդրում է նրա միջնորդությունը կայսեր առաջ աքսորից ազատ արձակելու Պատկանյանին և վերականգնելու նրա քաջանայական իրավունքը: Երբ դիմումը հասնում է փոխարքային, Պատկանյանն արդեն ազատության մեջ էր գտնվում, ուստի, քննելով երկրորդ խնդրանքը, փոխարքան անհամար է գտնում այդ հարցով դիմել Ալեքսանդր Երկրորդին, քանի որ նրա անմիջական կարգադրությամբ էր Պատկանյանը կարգազուրկ արվել²⁸:

Այդ նամակում ներսեռին հաջորդած Մատթեոս կաթողիկոսը հետևյալ կերպ է բնութագրում Գաբրիել Պատկանյանին. «Ունելով զլայնածալ գիտություն, գոյով քաջ հայկաբան, հմուտ՝ գրականութեան, լեզուին ուսուց. հորինող և թարգման բազում օգտակար մատենից, հազվագիտ ճարտասան, պոետ և շնորհազարդ մատենագիր, նա չկարէ բերել զօգուտ ինչ մարդկութեան՝ ի ներկա բնակութեան իւրում և ձիրք նորա կորնչին ի գուրս, մինչ... կարէ նա ցուցանել զմեծամեծ ծառայութիւնս և զօգուտ հայկազանց ի գործս ազգային լուսաւորութեան»²⁹: Ազգային լուսավորության գործին Պատկանյանն արդեն չէր կարող անմիջականորեն մասնակցել, բայց կյանքի վերջին շրջանում ստեղծած գրական գործերով և մասնավորապես իր «Յիշատակարանով» նա մեծ ծառայություն է մատուցել հայ գրականությանն ու բանասիրությանը:

1889 թ. վախճանվում է Գաբրիել Պատկանյանը: Այդ առիթով գրած «Տէր-Գաբրիէլ Պատկանյան» հոդվածում Ալ. Երիցյանը հայ գործչի տեղի և դերի պարզաբանումից հետո սրամիտ մի ընդհանրացում է կատարում, որի մեջբերումով էլ ավարտում ենք մեր խոսքը «Կովկասի» առաջին խմբագրի բարդ ճակատագրի մասին: «Ներկա րոպեին... եթե մեկը հարցաներ, թե ո՞վ է ննջում այս թարմ շիրիմի մեջ, կպատասխանեինք՝ «Դա է Սերոբե վարժապետի որդին, Ալամգարյանի դասընկերը, Նալբանդյանի վարժապետը, «Արարատ» ամսագրի խմբագիրը, պրոֆեսոր Քերոբեի հորեղբայրը և մեր բանաստեղծ Ռաֆայելի (Գամառ-Փաթիպայի) հայրը: Այսքանը բավական չէ՝ արդյոք Տէր-Գաբրիէլ Պատկանյանին ճանաչելու համար»³⁰:

Թե՛ Մատթեոսի նամակը, և թե՛ Ալ. Երիցյանի հոդվածը Պատկանյանի վաստակի ճանաչման կարևոր և օբյեկտիվ վավերագրեր են: Ներսես Աշտարակեցին, սակայն, Պատկանյանի մասին ունեցած իր կանխակալ կարծիքները կազմել էր նախ՝ Սերոբե Պատկանյանի նկատմամբ ունեցած անբարյացակամության, ապա թեմում իր առաջնորդության տարիներին կուտակված հոգսերի, նախիջևանցիների բախումների ու գծադրությունների բազմա-

²⁷ Գ. Պատկանյանի գրական գործերը և հրապարակախոսական հոդվածները հանգամանորեն վերլուծված են բանասիրական գիտությունների դոկտոր Շ. Նազարյանի «Գաբրիել Պատկանյանի կյանքն ու գրական-հասարակական գործունեությունը (1830—60-ական թթ.)» օգտաշատ ուսումնասիրության մեջ (1956 թ.):

²⁸ Պատկանյանի քահանայական իրավունքները վերականգնվում են միայն 1878 թ.:

²⁹ Արձագանք, 1889, № 15, էջ 232:

³⁰ Նույն տեղում, էջ 233:

շերտ հիմքի վրա: Իբրև առաջնորդ, նա չփորձեց վերափոխել կենցաղային մանրախնդիր ասեկոսենների անառողջ մթնոլորտը և ղեկավարվել առդարության չափանիշներով:

Արդեն կաթողիկոսության հեղինակավոր աստիճանին հասած Ներսես Աշտարակեցու գործունեության անփառունակ էջերից դարձան Պատկանյան-բազմահմուտ մանկավարժի վտարումը Ներսիսյան դպրոցից և արդեն որոշակի հաջողությունների հասած արևելահայ մեր միակ թերթի դադարեցումը: Նա, իհարկե, լավ դիտեր, որ դպրոցն ու մամուլը ազգային լուսավորության խթանման հիմնական նախադրյալներն էին: Գիտեր և, այդուհանդերձ, դրանք ստորադրում էր իր՝ իշխողի քմահաճույքներին: Այս իրավիճակը նկատի ունենի Ռաֆայել Պատկանյանն ու Միքայել Նալբանդյանը: որոնք Գաբրիել Պատկանյանի աքսորի տարիներին իրենց գեղարվեստական գործերում իրարից անկախ արձագանքել են այս տխուր իրողությանը: Այսպես՝ իր «Դև Մբուս» (1855 թ.) ազգային ավանդության մեջ Ռ. Պատկանյանն Աշտարակեցուն ներկայացնում է իբրև դժոխքի դեերից մեկը, որը, մտնելով Հայաստան աշխարհը, կարճ ժամանակամիջոցում մարդկանց լարում է միմյանց դեմ, տեղիք տալիս կռիվների ու խռնակության:

Միքայել Նալբանդյանը «Սատանայի պաշտոնական մեծ հանդեսը» պամֆլետում (1858 թ.) ի թիվս ժամանակի այլ գործիչների, քննադատել է նաև Ներսես Աշտարակեցու գործունեությունը, որն ամբողջությամբ վերցրած համարում է ծառայություն՝ հանուն դժոխքի փառքի: Եթե մեղմելու լինենք «Սատանայի պաշտոնական մեծ հանդեսի» ժանրին բնորոշ պամֆլետային տարրերը, դարձյալ չի կարելի չնկատել, որ Ներսեսին ներկայացվող մեղադրանքների հիմքում ընկած են միանգամայն ուշադր փաստեր: Նալբանդյանն առաջին հերթին ընդգծում է նրա խռովասիրությունը, նշում, որ եթե նա մի տեղ խռովություն է նկատել, ջանացել է վեճը, կռիվն ու բողոքները բորբոքել: Մի կողմ թողնելով մնացած ծանր մեղադրանքները, որոնք դուրս են մեզ հետաքրքրող խնդրի շրջանակներից, կուզենայինք ընդգծել դրանցից վերջինը: Նալբանդյանը դրում է. «Դորա ծայրագույն Բրամին դառնալուց հառաջ, լավ ու վատ կային դպրոցներ, ուր մի քանի բան սովորում էին, բայց այն օրից, երբ սա ստացավ ծայրագույն իշխանությունը, նախանձավոր լինելով դժոխքի փառքին, քանդեց և կործանեց այդ վարժատունը, ցրվեց աշակերտքը, հալածեց վարժապետը...»³¹: Պարզ է, իհարկե, որ ուսուցչի հիշատակությամբ Նալբանդյանն ակնարկում էր Գաբրիել Պատկանյանին, որն այդ օրերին փակված էր Ռոստոմի բանտում:

Անդրկովկասի առաջին հայ պարբերաթերթը՝ «Կովկասը», դադարեց ցարական վարչական ապարատի կամայականության հետևանքով. «Արարատի» դադարեցումը կապված էր «տեղական», հայկական «հանգամանքների» հետ: Նորաստեղծ հայ մամուլի ճակատագիրն այսպիսով կախված էր և՛ Կովկասի փոխարքայության վարչարարների «մեծահոգությունից», և՛ ֆեոդալական ժամանակներից ժառանգություն մնացած դոգմատիկ հասկացությունների դեմ մղվելիք պայքարի ելքից:

Գաբրիել Պատկանյանը՝ մեր առաջին բազմակողմանիորեն զարգացած և լուսամիտ խմբագիրը, մենակ էր և անզոր՝ երկու ճակատի դեմ տարվող պայքարում: Նոր ժամանակներում գործելու և հաղթելու համար անհրաժեշտ էին նոր տիպի գործիչներ, որոնք, ձերբազատված անցյալի կղերապաշտ, նողական աշխարհայացքի պարտադրող պայմանականություններից, ունենային եվրոպական չափանիշների գիտական մակարդակ և պայքարող մարտիկի առանձնահատուկ կոփվածք: Այդ հատկանիշներով էին օժտված 1850-ական թվականների հայ լուսավորիչները, որոնք պետք է փոխարինեին Գաբրիել Պատկանյանին:

³¹ Միքայել Նալբանդյան, Երկրի լիակատար ժողովածու, հ. 1, Երևան, 1979, էջ 378:

ГАБРИЭЛЬ ПАТКАНЯН И НЕРСЕС АШТАРАКЕЦИ

М. А. МХИТАРЯН

Р е з ю м е

Армянский общественный деятель и педагог первой половины XIX века Габриэль Патканян всегда был в центре армянской общественной жизни и своей деятельностью во многом способствовал повышению культурного уровня армянского народа. Живя в Тифлисе, он посвятил себя журналистике, принимал активное участие в редактировании газеты «Ковкас», а в 1850—1851 гг. на новом армянском языке (ашхарабаре) издавал газету «Арарат».

Однако несмотря на то, что Патканян развернул широкую просветительскую деятельность, он всегда подвергался гонениям и не находил поддержки со стороны Нерсеса Аштаракети, являвшегося в те годы духовной главой Бессарабской и Ново-Нахичеванской епархии, а впоследствии—католикосом всех армян. Привлеченные новые архивные документы способствуют глубокому осмыслению сложных взаимоотношений между Г. Патканяном и Нерсесом Аштаракети.

GABRIEL PATKANIAN AND NERSES ASHTARAKETSI

М. Н. МКХИТАРИАН

S u m m a r y

Armenian public figure and teacher of the first part of XIX c. Gabriel Patkanian was always in the centre of Armenian social life and with his activity largely promoted the rise of cultural level of Armenian people. Living in Tiflis, he devoted himself to journalistic, took active part in editing of the paper "Kovkas" and in 1850—1851 published the paper "Ararat" with new Armenian language (ashkharhabar).

However, notwithstanding that Patkanian began a great instructive activity, he was always subjected to persecutions and didn't find support by Nerses Ashtaraketsi, who was in those years religious head of Bessarabian and New-Nakhidjevan bishopric and afterwards catholicos of all Armenians. Attracting new files promote the deep sense of complex relations between G. Patkanian and Nerses Ashtaraketsi.